

# AKAM NTE EKPEPDE KE ÑWED JAMES

James 1:5-7; 4:1-10; 5:13-18

QYQHỌ UKPEP-ÑKPỌ 468

Eke Ikpọ Owo

**IKỌ IBUOT:** “Elijah ekedi owo emi enyenede mbiet uduot nnyin, enye onyuñ ọbọñ akam eti-eti, ete edim okudep; ndien edim idepke ke isọñ ke isua ita ye ọfiọñ itiokiet” (James 5:17).

## I Mme Eñwọñọ Abasi Esu Ke Ini Inamde Udeme Nnyin

- 1 Mbuọtidem edi akpan ñkpọ emi owo enyenede ndida mbọ ñkpọ ekededi nto Abasi, James 1:5-7; Mme Hebrew 11:6; Mark 11:20-24
- 2 Nnen-nen udọñ edi se ifonde ndida mbọ ibọrọ akam, James 4:1-5
- 3 Ndibine Abasi ke nsuhoridem edi akpan ñkpọ, James 4:6-10; Isaiah 57:15; Luke 1:51-52
- 4 Akam mbuọtidem eyenyaña enye emi ọdọñode, James 5:13-15; Isaiah 53:5; Mark 16:18
- 5 Ubiọñọ ke mme akam ekeme ndito unana ntiñ-enyin, unana erifen, unana edinehere ukwañ usuñ, unana ndiyarare ndudue ye unana erikabaresit, Jeremiah 29:13; Mark 11:25, 26; Ezekiel 33:14, 15; 1 John 1:9; Luke 13:3; James 5:16
- 6 Enọ Elijah nte uwut-ñkpọ ke abaña ñkpe-ubọk edinen owo emi enyenede odudu ndinam ñkpọ, James 5:17, 18; 1 Ndidem 17:17-24.

## SE EKPEPDE EBAÑA

### Mbuọtidem

Ediwak akam edi se minyeneke ibọrọ, ndien mme owo esima ndibup ntak edide ntre. Ibọrọ eke ememde iduhe, edi nte nnyin ikpepde Ikọ Abasi, ndusuk mme ntak ewọrọ ewut idem. James etiñ ọnọ nnyin: “Edi edieke owo mbufo ekededi ananade eti ibuot, yak enye ebeñe Abasi, emi ọnọde kpukpru owo ke ntarubọk, minyuñ itọhọke owo; ndien Abasi eyenọ enye. Edi yak enye ebeñe ke mbuọtidem, okuyok; koro owo eke oyokde ebiet mbufut mmọñ, eke ofim eberide, emen, otop, ọduok ko. Owo oro okuse ete, imọ iyebọ baba ñkpọ kiet ke ubọk Ọbọñ” James 1:5-7).

Mbuọtidem edi akpan ukpọhọre emi edade eberede ufọk unim ñkpọ Heaven. Jesus eneñere etiñ owut ntak emi owo ekpenyenede mbuọtidem ke ini Enye ọdọhọde ete: “Enyene mbuọtidem ye Abasi. Ke akpanikọ ke ndọhọ mbufo, owo ekededi eke edidọhọde akamba obot emi ete, Wuhọre, kọduọ sine ke akwa inyañ; midinyuñ iyikke ke esit esie, edi onimde ke akpanikọ ete se imọ itiñde eyesu, eyewọrọ ọnọ enye. Mmọdo ndọhọ mbufo nte, Kpukpru ñkpọ ekededi eke mbufo ebọñde akam ebeñe, enim ete mme imọ ima ibọ inyene, ndien eyewọrọ ọnọ mbufo” (Mark 11:22-24).

### Ntiñ-enyin

“Edi ke mbuọtidem miduhe, owo ikemeke ndinem Abasi esit; koro owo eke asañade ekpere Abasi enyene ndinim ete Enye ododu, onyuñ edi Andinọ mmọ emi eyomde Enye utip” (Mme Hebrew 11:6).

Mme akam emi edibọrọde edi se edade ntiñ-enyin ye esit akpanikọ ebọñ. “Ndien mbufo eyeyom mi, enyuñ ekut mi, koro mbufo edibinede mi ke ofuri esit mbufo” (Jeremiah 29:13). Jesus ọdọhọ ete: “Mbufo mbon mbubik, Isaiah ototim etiñ nte prophet abaña mbufo, ete, Mbio emi ekpono Mi ke mkpọk-inua mmọ; Edi esit mmọ ada nsan-nsan ye Ami” (Matthew 15:7, 8). Akam ke mkpọk-inua ikpọñ iñwamke: “Koro owo ada esit onim ke akpanikọ enyene edinen ido; onyuñ ada inua onyime enyene erinyaña” (Ñwed Mbon Rome 10:10).

### Eriyarare Idiok-ñkpọ

“Edieke nnyin iyararede mme idiok-ñkpọ nnyin, Enye edi anam-akpanikọ onyuñ enen, ete ifen mme idiok-ñkpọ nnyin, inyuñ iyet nnyin isana ke kpukpru mme ukwañkpọ” (1 John 1:9). Ndiyarare idiok-ñkpọ

edi ndinyime nte ke ima inam idue. Enyene ndusuk mmọ emi emende ndudue mmọ edori owo efen, mme enyuñ ebatde ete ke mmimọ idiokke ntre, mme ndinyuñ ndomo ndidohọ mbaña mbon efen nte ediokde ekan mmọ. David ama ọbọñ akam ete: “Mmọfiok ndudue mi: idiok ido mi onyuñ odu mi ke iso kpukpru ini” (Psalm 51:3).

### **Erikabare Esit**

Erikabare esit edi ediwoñore iso: ñkabare edem ñwut idiok-ñkpọ. “Yak idiok owo ọkpọñ usuñ esie, yak oburobut owo ọkpọñ ekikere esie: onyuñ afiak etiene Jehovah: ndien enye eyetua enye mbom; etiene Abasi nnyin, koro Enye eyewak ndidahado” (Isaiah 55:7). Edieke owo omumde ñkpọ kiet ekededi akama emi edide idiok-ñkpọ, “Owo oro okuse ete, imọ iyebọ baba ñkpọ kiet ke ubok Ọbọñ,” “Mma ñkpokut idiok ido ke esit mi, Ọbọñ ikpokopke” (Psalm 66:18).

### **Edidahado**

“Ini ekededi eke mbufo edade ebọñ akam, edieke mbufo enyenede ikọ ye owo, edahado enọ enye; man Ete mbufo emi odude ke Heaven okponyuñ adahado ọnọ mbufo ke ndudue mbufo” (Mark 11:25, 26). Ekpededi nnyin imenen ke edinam nnyin, mme ke ini mmọ emi eduede nnyin ediokde eti-eti, ekpep nnyin ete, “Kpa nte Ọbọñ ekefende mbufo, efen mmọ eñwen kpasuk ntre” (Ñwed Mbon Colossae 3:13). Utim ikafañ? “Tutu osim ikatiaba ke itie ata ye duop” (Matthew 18:22).

### **Edineñere Ukwañ Usuñ**

Edieke idiok owo oyomde erifen oto Abasi, idighe ndifen nnọ eyen-eka esie ikpọñ-ikpọñ, edi enye enyene ndinam se inende ke ndimen ñkayak edieke enye okoyipde ñkpọ esie mme ekeduede enye ke usuñ ekededi. “Edieke adade enọ fo edi ke itie-uwa, onyuñ etide do ete, eyen-ete fo enyene ikọ ye afo, kpọñ enọ fo do ke iso itie-uwa, ka kebem iso nam emem ye eyen-ete fo, ndien di diwa enọ fo” (Matthew 5:23, 24). “Ndien enye akabare ọkpọñ mme idiok ido esie, onyuñ anam edinen ido ye eti ido; idiok owo ama ayak ñkpọ ubiọñ, ayak se enye adade ke ñwo, asaña ke mme ewuhọ uwem, minyuñ inamke mme ukwañ-ñkpọ; enye iditreke ndidu uwem, idikpaha mkpa” (Ezekiel 33:14, 15).

### **Nsuhọre-idem**

“Abasi ọbiọñọ mbon iseri, edi ọnọ mbon nsuhọre-idem mfọñ” (James 4:6). Iseri owowut idem esie ke ediwak usuñ. Ndusuk owo, oto ke ọkpọsọñ ntañ-idem, iyomke mme owo ekut mmọ nte eworode esaña eka mkpọ-itie eseme ndibọñ akam. Enyene mbon eken emi mimaha ndika ndusuk ufok-Abasi sia mmọ ebatde mbon oro nte mme okpono Abasi ke akani ido. Naaman ke akpa ifet, oto ke iseri, ikonyimeke ndiyere ke Jordan; edi ke enye ama ọkọsuhọre idem esie, onyuñ okop uyo, ama ọbọ erikok. “Esuk idem ndien enọ Abasi.”

### **Ndiñwana Ye Satan**

Satan edi osu-nsu, edi ndusuk owo enim enye ke akpanikọ. Mmọ ete, “Satan eketiñ emi mme oko ọnọ mi.” Ke ini mmọ ekpeñwanade-ñwana, mmọ ekabare ebọbiọñ utọñ enọ Satan. “Eñwana ye Satan, ndien enye eyefehe ọkpọñ mbufo.” Men ekikere fo dori ke Abasi. Ke ọbọñde akam, yak esit fo sin ntọtuñọ-ntọtuñọ ke se afo ọbọñde akam abaña. Mme ikọ emi etiñde ndien-ndien ekeme ndikabare ndi ikpikpu ikọ emi minyeneke ufọñ, ke adaña emi ekikere fo oyokde nte mfefere ñkpọ ke enyọñ mbufut inyañ. “Ke ini ebọñde akam, ekuyire nditetiñ ikpikpu ikọ, nte mme Gentile enamde; koro etie mmọ nte erikop akam oto ke uwak ikọ eke etiñde” (Matthew 6:7).

### **Ndiyire Ke Akam**

“Mbufo inyeneke, koro mbufo mibeñeke.” Efen-efen ebeñe enyene ukpuhọre ye ntọtuñọ udọñ. Jesus etiñ abaña ebe-akpa emi ọkọbode iborọ oto ukwañ ebire-ikpe oto ke enye ndisuk nyire. Enye ọdohọ ete, “Nte Abasi idinyuñ isioho usiene inọ ndimek ikot Esie, emi esemedede enọ Enye uwemeyo ye okoneyo, okposuk edi nte Enye emede anyan ime ke ikọ mmọ?” (Luke 18:7).

### **Ndibeñe Ke Idiok Usuñ**

“Mbufo ebeñe, edi inọñọ mbufo, koro mbufo ebeñede ke idiok usuñ, man eda edep ñkpọ-mbre.” Edieke nnyin iyomde edidiọñ Abasi, ndien inamke ñwa-idem eke ekemde, nnyin ibeñe ke idiok usuñ. Edieke nnyin iyomde ndidok ke ini nnyin mikotohọ, nnyin ibeñe ke idiok usuñ. Edieke nnyin idoride enyin ndibọ anyanya ke ini mibiomke krọs, nnyin ibeñe ke idiok usuñ. Mbet ikponke ikan Ọbọñ Esie, “Emi okobiomde krọs,

onyuñ abatde but ke ekpri ñkpọ, kabaña idaresit eke anade Enye ke iso” (Mme Hebrew 12:2). “Mbufo ifiokke se ebeñede” edi ikọ emi Jesus eketiñde ye owo mbet Esie iba emi ekeyomde nditie kiet ke ubok nnasia, kiet ke ufien ke Obio Ubọñ Esie. “Nte mbufo emekeme ndiñwọñ cup emi Ami mmọñ ññwọñ? (Matthew 20:22).

“Adaña didie akan oro ke Ete mbufo ke heaven ediyak Edisana Spirit ọno mmọ eke ebeñede Enye?” Abasi eyenọ mmọ oro ebeñede Edisana Spirit, edieke mmọ ebeñede ke ofuri esit. Enọ Edisana Spirit nte Ada-usuñ; nte nnyin imebeñe idem nditiene Enye? Enọ Enye nte Andikpep; nte nnyin imebeñe idem ndikpep nto enye? Enye eyenọ nnyin odudu edieke nnyin inyimede ndida enye nnam utom nnọ Enye. Simon ada okuk ọsok mmọ, onyuñ ọdọhọ ete, “Enọ mi nde odudu emi,” edi enye ekebeñe ke idiok usuñ. Esit esie ikenenke. Yak nnyin ikubeñe mme ñkpọ Abasi ito ke idiok udọñ, mme ke abaña inemesit, edi yak edi ke se idade ubọñ inọ Enye.

### **Mkpọsọñ Akam Mkpe-ubok Emi Enamde Ñkpọ**

Elijah ekedi owo emi ekenyenede esit mbom abaña erinyaña Israel. Enye okoyom mmọ ewọñọre ekpọñ ukpono ndem etiene odu uwem Abasi. Enye ọbọñ akam anam mkpe-ubok man edim okudep. Enye ama ọfiok ete edieke Abasi ediborode ebeñe esie ndutuhọ ye ukut eyedu. Enye ama odu ke mbeñidem nditiene ndiyọ ọkpọsọñ ini oro, edieke oro edisinde Israel ewọñọre etiene Abasi. Abasi ama ọborọ akam esie. Enye odomo, owut Israel nte Abasi enyenede odudu. Abasi ọtọñọ ntak ọborọ. “Enye onyuñ ọtọñọ ntak ọbọñ akam, ndien enyọñ ọno edim, isọñ onyuñ osioño mbuñwum.” “Mkpe-ubok edinen owo enyene odudu eti-eti ndinam ñkpọ.”

### **MME MBUME**

- 1 Eda owo emi oyokde nyok edomo ye nso? Nso idi mme iborọ akam esie?
- 2 James ọdọhọ ete, “Mbufo inyeneke.” Ntak emi mbufo minyeneke?
- 3 ‘Mbufo ebeñe edi inọñọ mbufo.’ Ntak edide ntre?
- 4 Siak ata akpan ñkpọ kiet emi anade owo enyene man ọbọ iborọ akam esie.
- 5 Sia ndusuk ñkpọ emi ekemede ndibiọñọ anam-idiok ndibọ erinyaña.
- 6 Nso ke eteme owo Abasi ndinam ke ini enye ọdọñode?
- 7 Nọ ndusuk ntak emi akanamde Abasi ọborọ mme akam Elijah.
- 8 Tiñ mme itie ke Ikọ Abasi emi etiñde ñkpọ abaña iseri.
- 9 Siak mme itie ke Ikọ Abasi emi ewutde usuñ nte emanade obufa.
- 10 Siak ndusuk itie ke Ñwed Abasi ndisọñọ mme eñwọñọ Abasi ke abaña erikok-udọñọ ikpohidem.